

**TEZAUUR LITURGIC**  
**12 SEPTEMBRIE**

**ACATISTUL**  
**SF. CUVIOS**  
**SIMEON**  
**DE LA**  
**VERHOTUR**



**MOSCOVA, 2000**



# Акафист

## святому праведному Симеону, Верхотурскому чудотворцу

### Кондак 1

---

Избранному и дивному новому сибирския страны чудотворцу всерадостно ныне приносим ти, святе Симеоне, хвалебная пения; ты же, яко имеяй дерзновение ко Христу Богу, от всяких нас бед свободи, да зовем ти: Радуйся, Симеоне, чудотворче предивный.

### Икос 1

---

Ангел во плоти и небесный человек явился еси, блаженный Симеоне, ангельски бо в мире сем пожил еси, темже и ангельстии чини удивишася непорочности твоего жития и, по преставлении твоём, с веселием прията праведную твою душу; сего ради и мы, чудящася высоте твоея добродетели, прославляем тя сице:

Радуйся, яко свято и богоугодно на земли пожил еси;

Радуйся, яко подвигом добрым zde подвизався, течение свое праведно скончал еси;

Радуйся, яко ныне преселился еси в покоища небесная;

Радуйся, яко в обителях премирных, яже уготована Бог любящим Его, на нескончаемыя веки водворяешься;

Радуйся, яко Царь царствующих прият тя в Небесное Царствие;

Радуйся, яко присно со ангелы в небеси обитаеши;

Радуйся, яко с пророки и апостолы вселяешься;

Радуйся, яко с постники и преподобными торжествовати сподобился еси;

Радуйся, яко предстоиши ныне со всеми святыми Престолу Божию;

Радуйся, яко Пресвятую Троицу несредственно зрети сподобяешься;

Радуйся, яко неизреченную славу Господню явственно созерцаеши;

Радуйся, яко тоя причастника быти удостои ты Господь;

Радуйся, Симеоне, чудотворче предивный.

## Кондак 2

---

Видя вдовицу зело плачущую, якоже бо тогда умилосердився, и изнемогшу телом и бывшу близ конечнаго издыхания и очима нимало зрети могущу, явився исцелил еси, сиче и о мне умилосердися, угодниче Божий, и от многих грехопадений немощствующее тело мое исцели и душу мою ко спасению настави, да в радости воззову к Богу песнь: Аллилуиа.

## Икос 2

---

Разумети хотящу архиерею сибирския страны имя твое, егда обретены быша святыя твоя мощи, ты в видении явлься ему, о имени своем возвестил еси; он же, удивився чудеси и прославив Бога, и похвальныя глаголы вещая, вопияше тебе сиче:

Радуйся, великий праведниче Божий, в чудесех просиявый;

Радуйся, целебниче недугов всем, призывающим тя с верою;

Радуйся, яко и прежде прошения помощию предваряеши;

Радуйся, яко и недоумевающих о  
прославлении нетленных мощей твоих чудесы  
твоими вразумил еси;

Радуйся, яко разслабленных укрепил еси;

Радуйся, яко слепым прозрение даровал еси;

Радуйся, хромым хождение устрояя;

Радуйся, от беснующихся бесов отгнателью;

Радуйся, скорбных утешителю;

Радуйся, нищих и убогих покровителю;

Радуйся, православных утверждение;

Радуйся, ересей посрамление;

Радуйся, Симеоне, чудотворче предивный.

### **Кондак 3**

---

Сила Вышняго утверди тя в житии твоём  
святом; и ты подвизался еси о спасении души  
твоея, трудами бо и воздержанием увядил еси  
плотския страсти и в непрестанных молитвах  
твоих всегда взывал еси к Богу: Аллилуиа.

### **Икос 3**

---

Имеяй милосердие многое, о призывающих тя  
с верою присно молишися к Богу, у Него же  
равноангельным житием твоим великое

дерзновение стяжал еси; не презри и нас недостойных, требующих твоея помощи, и яко дары, прими от нас песнь сию:

Радуйся, яко вся, елика просиши от Бога, дарует ти Господь;

Радуйся, яко молитвы твои о нас, якоже кадило благовонное, от Бога приемлются;

Радуйся, яко возжада душа твоя к Богу крепкому;

Радуйся, Христа единого возлюбивый;

Радуйся, яко невозвратным желанием последовал еси Ему;

Радуйся, добродетельное житие всегда имевый;

Радуйся, возненавидевый страсти мира сего;

Радуйся, маловременнаго утешения на земли не искавый;

Радуйся, смиренномудрием украсивыйся;

Радуйся, твердый адаманте и столпе непоколебимый прилоги вражиими;

Радуйся, яко нетлением тело твое прослави Господь;

Радуйся, яко от гроба твоего и персть приемлющи исцеляются;

Радуйся, Симеоне, чудотворче предивный.

#### **Кондак 4**

---

Буря недоумения смущает мя, како возмогу достойно воспети чудеса твоя, блаженне Симеоне, кто бо многих чудотворений твоих дары по достоинству изреши может? Обаче и аз дивно в тебе прославляющемуся Богу вопити дерзаю: Аллилуиа.

#### **Икос 4**

---

Слышавше, блаженне и предивне Симеоне, о величии чудес твоих, яко молитвами твоими сущих в бедах и скорбех предваряеши, скоро от них избавляя, вопием тебе таковая:

Радуйся, избавление наше от печалей и скорбей;

Радуйся, яко твоим предстательством даруется духовная благодать всем, с теплою верою к тебе притекающим;

Радуйся, яко твоими молитвами козни нечистых духов побеждены;

Радуйся, яко и неведущим и неслышавшим о прославлении твоём исцеление подаеши;

Радуйся, яко целебныя дары всюду точиши;

Радуйся, яко страну сибирскую присно присещаеши;

Радуйся, скорый обидимых заступниче;

Радуйся, сущим в лютых обстояниих пособниче и предстателю;

Радуйся, малодушныя утешаяй;

Радуйся, недужным крепкое исправление;

Радуйся, плененным скорое освобождение;

Радуйся, грешным ко спасению наставление;

Радуйся, Симеоне, чудотворче предивный.

### **Кондак 5**

Пресветлая звезда явился еси, праведный Симеоне; сущих бо во тьме умныя очи озаряя светом Евангелия Христова и избавляя заблуждших от сетей змиевых и от всех коварств его, научил еси я благодарственно и всерадостно с лики святых ко Христу Богу вопити: Аллилуиа.

## Икос 5

Видевше в житии твоём, блаженне, духовных подвигов твоих высокая исправления, всякий разум удивляющая, прославляем давшего ти такую благодать Бога, тебе же хвалебными гласы сие вопиём:

Радуйся, яко юрод быв Христа ради, высоту смиренномудрия стяжал еси;

Радуйся, яко странник и пришлец на земли обрелся еси;

Радуйся, яко ныне гражданином небесным быти на нескончаемыя веки сподобился еси;

Радуйся, яко незлобивый агнец в терпении твоём был еси;

Радуйся, яко кротостию ко озлобляющим тя землю живых наследовал еси;

Радуйся, чистыми душу и тело твое сохранивый, и ныне чистым сердцем зряй Бога;

Радуйся, яко мудрою мыслию утвердивый душу твою во спасение;

Радуйся, яко с невозвратною надеждою благ вечных преставился еси к Богу;

Радуйся, яко деснаго стояния со избранными  
удостоился еси;

Радуйся, яко не скрыл еси таланта,  
ввереннаго ти Богом;

Радуйся, благий рабе и верный, вшедый в  
радость Господа своего;

Радуйся, яко ныне утешаешься, якоже  
древний оный евангельский Лазарь, на лоне  
Авраамли;

Радуйся, Симеоне, чудотворче предивный.

### **Кондак 6**

---

Проповедника богоноснаго Павла вещание и  
глаголы исполняя, Симеоне святе, юродственное  
Христа ради на земли пожил еси житие, и  
болезни многия претерпевая, всегда  
благодарственныя Богу возсылал еси хвалы,  
сице глаголя Ему: Аллилуиа.

### **Икос 6**

---

Возсиял еси велие просвещение светлостию  
чудес твоих, праведный Симеоне, от святаго  
гроба твоего непрестанно истекающих, и тем  
далече отгнал еси тьму ересей и расколов от  
окрестных мест, идеже в правоверии и

благочестии подвижался еси и в нетлении телеси почиши; мы же, чюдящися сим, взываем ти сице:

Радуйся, яко явился еси во стране сибирстей крепкий защитник православия противу развратников и хульников Христовы Церкви;

Радуйся, яко и ныне борющимся с ними усердный пособник обретаешься;

Радуйся, противников Святыя Церкви посрамителю;

Радуйся, злых волков от стада Христова отгнателю;

Радуйся, облекийся во оружие света; Радуйся, лукавствующих обличителю;

Радуйся, православных тихое пристанище;

Радуйся, путешествующих благое поспешение;

Радуйся, яко и от многия скудости твоея разумевал еси на нища и убога;

Радуйся, яко милостив быв при жизни, благовториши всем требующим и по смерти;

Радуйся, яко избрал еси добрая, еже Бога ради труждатися;

Радуйся, яко на тебе исполнися слово подвижническое, болезненно, еже труждатися, но блаженно восприятие;

Радуйся, Симеоне, чудотворче предивный.

### **Кондак 7**

---

Хотящу некоему человеку от многих врачей исцелитися от очныя болезни, и егда ничтоже успе, прибегшу к тебе, врачу безмездному, ты очи его, наполнены кровию и зрети немогущая, перстию внезапно исцелил еси; он же возрадовався, благодаряше тя и, Бога прославляя, рече: Аллилуиа.

### **Икос 7**

---

Дивна ты показа нам Творец и Господь всех чудотворца: егда бо нетлением прослави тело твое, тогда и земля не скры гроб твой и яви всем нам, яко многоценное сокровище; темже и мы чюдящися вопием сице:

Радуйся, цвете нетленный, в стране сибирстей прекрасно процветый;

Радуйся, доблий подвижниче благочестия, во граде Верхотурстем возсиявый;

Радуйся, яко являешия аки древо животное,  
от негоже недугующии получают исцеление;

Радуйся, яко предстательством твоим пред  
Богом, аки ветвь благосеннолиственная,  
покрываеши нас;

Радуйся, яко добре вкоренился еси в  
вертограде Христовы Церкви;

Радуйся, яко обильные плоды добродетелей  
принесл еси Богу;

Радуйся, яко пиеши ныне воду животную от  
неисчерпаемаго источника бессмертия;

Радуйся, заблуждших наставниче;

Радуйся, яко кающимся в согрешениях  
испрошаеши от Бога прощение;

Радуйся, и всех благих нам от Него ходатаю;

Радуйся, яко светлую одежду чистоты и  
целомудрия добре сохранив, вшел еси в чертог  
небесный;

Радуйся, яко чистая душа твоя к лику  
Евангельских мудрых дев сопричтесе и купно с  
ними (ангельски) водворяется в небесном  
чертозе Жениха Христа;

Радуйся, Симеоне, чудотворче предивный.

## Кондак 8

---

Странное на земли житие пожив и удалився суетнаго мира, добродетельми к Богу приблизился еси, сего ради высокий Бог, видя твое смирение, возвеличи тя Своею благодатию; Егоже восхваляюще, поем Ему купно с тобою ангельскую песнь: Аллилуиа.

## Икос 8

---

Весь ум твой в вышний Иерусалим присно простирая, аще телом и на земли пребывал еси, вся красная мира сего возненавидел и равноангельское житие zde пожил еси, Симеоне блаженне, тем и от чтущих тя слышиши сия:

Радуйся, человеце Божий досточудный;

Радуйся, зеркало добродетелей преизящных;

Радуйся, пременивый тленная настоящая на будущая вечная;

Радуйся, уподобивыйся Иову терпением;

Радуйся, селение честное Святыя Троицы;

Радуйся, святче Божий, со всеми святыми прославляемый;

Радуйся, ковчеже, от потопа греховнаго призывающих тя спасающий;

Радуйся, яко услаждал еси сердце твое  
веселием будущих благ;

Радуйся, воздержанием плоть твою  
изнуривший;

Радуйся, яко святостию жития твоего  
милость Божию обрел еси;

Радуйся, яко непрестанными молитвами о  
нас Бога умилостивлявши;

Радуйся, яко благим надеждам твоим  
исполнение приял еси;

Радуйся, Симеоне, чудотворче предивный.

### **Кондак 9**

---

Все множество человеческое удивися еже на  
земли во плоти твоему терпению и незлобию,  
непорочна и праведна ты зряще, и ныне  
милостивым твоим предстательством в скорбех  
нас не оставляюща; темже и мы, радуящеся, к  
Богу поем песнь: Аллилуиа.

### **Икос 9**

---

Витии многовещанная изнемогоша по  
достоинству поведати многое твое терпение и  
теплую ко Христу любовь; аз же многогрешный  
како возмогу изглаголати равноангельное твое

житие и преславная чудеса! Но обаче дерзаю, надеясь на твое беззлобие, вопити тебе сице:

Радуйся, яко ангелом подобяся, выну пушал еси на небо очи твоего сердца;

Радуйся, яко доблыми твоими подвиги спасение и венец нетленный от Христа Бога приял еси;

Радуйся, яко на всяк день и на всяку ночь славословил еси Творца всяческих;

Радуйся, яко победил еси диавола смирением своим;

Радуйся, яко нищ телом и духом был еси на земли, сего ради уготова ти Господь Царство Небесное;

Радуйся, кротости ради твоея наследивый землю обетования;

Радуйся, яко и иных, зрящих твою святость, научил еси праведно жити;

Радуйся, яко душевныя страсти испепеляеши;

Радуйся, яко телесныя болезни врачуеши;

Радуйся, яко и многовременныя недуги от человек отгоняеши;

Радуйся, яко сущим близ конечного издыхания здравие даруеши;

Радуйся, яко и от смертоносных язв свободяеши;

Радуйся, Симеоне, чудотворче предивный.

### **Кондак 10**

---

Спасение восхотев дати Господь людем Своим, светлаго светильника всем нам даде тебе, точаща благодать цельбы всем, притекающим к раце мощей твоих; и мы, получивше милость от безмезднаго тя врача, благодарными гласы восхваляюще Бога, поем песнь: Аллилуиа.

### **Икос 10**

---

Стена еси ты и покров всем притекающим к тебе, праведный Симеоне, ибо Господь прославитя, украсив нетлением и чудесы и приглашати тебе научи:

Радуйся, столпе непоколебимый православия;

Радуйся, сокровище неоскудно многих исцелений;

Радуйся, подателю просящим у тебе яже на пользу;

Радуйся, уцеломудривый живущия студно;  
Радуйся, наказателю помраченных умом;  
Радуйся, учителю смиренномудрия и терпения;

Радуйся, яко в сонях являясь, научаеши доброму житию;

Радуйся, звездо, чудесно возсиявшая в сибирстей стране;

Радуйся, яко лучами чудотворений твоих просвещаеши и далечайшия страны;

Радуйся, яко некогда незнаем, ныне же со славою познаваешия от всех ищущих тя;

Радуйся, яко рыбарем быв, соделался еси ловцем человеков;

Радуйся, яко ходатайством твоим к Богу мук вечных свобождаеши нас;

Радуйся, Симеоне, чудотворче предивный.

### **Кондак 11**

---

Пение умиленное приношу ти, недостойный, и вопию со слезами: ходатайствуй за мя присно к Богу, душою и телом от страстей, воюющих на мя, люте недугующаго, и подаждь ми молитвами твоими исцеление и грехов избавление, от

сердца тебе сия приносящему, да и аз в радости  
воспою прославляющему тя Богу песнь:  
Аллилуиа.

## **Икос 11**

---

Светоприемную свещу зрим тя, богомудре  
Симеоне: невестествен-ным бо любви огнем  
возжеглся еси и наставляеши к божественному  
деянию вся, образом жития твоего, яко зарею,  
просвещая чувства наша; темже и достоин еси  
званием почитаться сим:

Радуйся, луче пресветлая, от Солнца Христа  
возсиявшая;

Радуйся, светило благочестия немерцающее

Радуйся, яко свет премудрости Божия  
просвети душу твою;

Радуйся, яко вечнаго сего света лучей чрез  
тебе и мы сподобляемся;

Радуйся, безмездный врачу;

Радуйся, яко источаеши обильныя струи  
исцелений;

Радуйся, благонадежный о нас предстателю и  
молитвенниче пред Престолом Господним;

Радуйся, спасительное пристанище всем,  
притекающим к тебе;

Радуйся, яко сущим в пучине скорбей добр  
обретаешься кормчий;

Радуйся, теплый заступниче сущим во  
обстояниях лютых;

Радуйся, благоухание духовное источая от  
многоцелебных твоих мощей;

Радуйся, елеем радования исцеляяй скорби  
душевныя верою молящихся тебе;

Радуйся, Симеоне, чудотворче предивный.

### **Кондак 12**

---

Благодать превелию даде тебе Господь  
недужных болезни врачевати, демоны прогнати  
и страсти целити; темже не забуди и нас,  
усердно призывающих тя во время тесных  
обстояний и тяжких напастей, и молитвами  
твоими от оных избави, да благодарно вопием к  
Богу: Аллилуиа.

### **Икос 12**

---

Поюще твоя чудеса, праведный Симеоне,  
верою несомненною притекаем к  
многоцелебным и святым мощем твоим, и

припадая к ним, с любовью и страхом лобызаем оныя. Ты же, о святче Божий! Яко благоутробный, принеси моление ко Владыце, да сподобит нас деснаго стояния на суде Своем, вопиющих к тебе сицевая:

Радуйся, великий Христов угодниче;

Радуйся, молитвенниче усердный о воспевающих тя;

Радуйся, Божий избранниче, благодатию Духа Святаго приосененный;

Радуйся, праведниче, возвеселившийся о Господе;

Радуйся, яко мзда твоя многа на небесех;

Радуйся, предстателю наш скорый и теплый;

Радуйся, ходатаю неусыпный о нас пред Богом;

Радуйся, иго благое и бремя легкое понесый;

Радуйся, за труды твоя и подвиги на земли вечное упокоение обретый на небеси;

Радуйся, яко временных и вечных благ от Бога нам присно просиши;

Радуйся, о кающихся споручниче пред Богом;

Радуйся, кадило благовонное, благоухающее  
чтущих тя;

Радуйся, Симеоне, чудотворче предивный.

### **Кондак 13**

---

О пречудный и милостивый новый  
чудотворче, праведный Симеоне! Приими ныне  
малое сие моление наше и принеси е ко Христу  
Богу нашему, да сохранит нас от враг видимых  
и невидимых, от нашествия иноплеменник, от  
недуга и глада, от всякия скорби и внезапныя  
смерти и будущего вечнаго мучения избавит,  
молитвами твоими, всех вопиющих к Нему:  
Аллилуиа.

Этот кондак читается трижды, затем икос 1 и  
кондак 1



**ПОЛНЫЙ  
АКАФИСТНИК  
КАНОНИЧЕСКИЙ**

**АКАФИСТЫ  
КО ГОСПОДУ БОГУ  
ПРЕСВЯТОЙ  
БОГОРОДИЦЕ  
АРХАНГЕЛАМ  
И АНГЕЛАМ**

**І**

**НОВОЕ  
НЕБО**